

**Meeqqat piitsuussusaannut, ajornartorsiutip annertussusaanut aamma ajornartorsiummut qanoq iliorluni qaangiiniarluni aaqqiissutissaq pillugu apeqquteqaat aallaavigalugu oqallinnissamik siunnersuut.**  
(Inatsisartunut ilaasorta q Asii Chemnitz Narup, Inuit Ataqtigiit)

**Oqaaseqaat:**

Oqallissaarummut qujalluta Siumumiit imaattumik oqaaseqassaagut.

Meeqqat atugarisaat pitsanngortariaqarpoq, maani inersuarmi tamanna assortuussutigisariaqanngikkippit qularutigingilara, uniffipulli maani inersuarmi uaniinnerugunarpoq, qanoq pissutsit pitsanngortinniarnarlugu tulleriarinermik eqqartuineq ajoratta.

Meeqqatsinnut iliuusigut kisitsisitalersoraanni ajorluinnartut saqqummikaasarput, imminut toquttartut amerlavallaarujussuarput, aanngajaarniutinik (imigassaappata, ikiarooruarnuuppata) siusippallaarujussuurtumik misileraalertarput kingusinnerusukkut inuunerminni atornerluisunngortussanngorlugit, naammattumik nerisinnegartarsimangitsut amerlavallaartut ilisimaleqqavarput aamma, meeqqagut inersimasunik kinguaassiutitigut pinngitsaalineqartarneri amiilaarnartut amerlavallaarput allaat meeqqat meeraqatiminnik kinguaassiutitigut atornerluisunngortalerlutik. Kingullertigut MIO-mit sammineqarpoq meeqqat eqqarsartaatsimikkut arlaatigut innarlarsimappata ikiorneqarsinnaanngivissortutut inissisimaleqqaneri ajunaarnersuurtut isigisariaqartut.

Siumumiit isumaqarpugut nalunngikkaluarlutigu qujanartumik meeqqat nunatsinniittut tamarmik tamakkuningga atugaqanngikkaluartut, sulii amerlavallaarujussuurtut pissutsinik ajorluinnartunik atugaqartinneqartut. Oqaluuserisassanngortitsisup qulequtsiussinermi sammisaq piitsuussusermut attuumassuteqartikkaa maluginiarnarput.

Oqaaseq piitsuussuseq, meeqqat piitsuunerat nammineq akunnattoornarisara siammasissumik paasisassaavoq. Sutigut piitsuussuseq pisuussuseq maani inersuarmi sammissavarput taava? Misigissutsikkut? Aningaasatigut? Periarfissatigut?

Oqaaseq tigussaanngingajattoq imartoorujussuusinnaasoq imaqqanngissinnaasorlu, immaqa aamma taamaamat iliuuserpassuit siunnerfimminnut iluatsiffeqanngillat tigussaannngiusattunik oqalligisaratigut. Nunatsinnimi suliniuterpassuaqarpugut, tamarmik pitsaanerulersitsinissamik neriorsuuteqartut taamaattorli kisitsisit pitsaanerulersitsinermik takutitsinngillat.

Tamanna nunatsinnut ernumanartutut Siumuminngaani isigivarput, piaartumik pitsanngoriaatinik takutitsinnaanngikkutta piffissanngorpoq unikaallassalluni suliniutit sunniuteqanngitsunik ingerlataqarutta allanngortoqartariaqalerneranik oqariartuutaavoq uagullu inersuarmi maani oqallittugut pisussaaffeqarpugut ataatsimoorluta iliuuseqassalluta meeqqagut pillugit, nunarput pillugu.

Meeqqagut ilatsiinnartuunatik eqeersimaartuullutik nunatsinnik napatitsisunngussagunik sutigut tamatigut pitsanngorsaait iluatsittut takussutissalinnik suliniuteqalernissarput piffissanngorpoq.

Inersuarmit maani kisitta suliassaqaanngilagut, tamatta suleqataasariaqarpugut nuna tamakkerlugu politikeriugutta, kommunini politikeriugutta, angajoqqaagutta ilaqutaaguttaluunniit.

Angajoqqaatut meeqqanut akisussaasutut pingaarnerpaamik inissisimapput tamanna killissaa tikivillugu angajoqqaatut qimarratigisinnaanngivipparput, akisussaaffigivarput meerarput peqqissuutissallugu, nerisissallugu, ilinniartissallugu inuunermini ineriartornissaanik pitsaanerpaamik toqqammavississallugu. Inersimasunngortissallugu imminut pilersorsinnaasoq, kiffaanngissuseqarluni periarfissaminik atuisinnaanngortissallugu, innuttaaqataanermut suliassartaanut tunniusimalersissallugu nunatta namminiilivinnissaanut kivitseqataasussanngorlugu.

Siumumiit isumaqarpugut oqaluttuarisaanitsinnilu uagut iliuuserisimasagut sammiunnaarlugit ullumikkut killiffik akisussaaffiittut tigullugu ajunngitsortai ajortortaalu ilanngullugit qanoq iliuseqarfiginissaanut sammisariaqalerpugut. Imassaaleqinngeqaarmi nalunaarusiarpassuit misissuinerpassuillu meeqqagut pillugit ingerlanneqareerput, tullinnguuppoq alloriarnerup tullia alloriarfigissagipput.

Alloriarneq tullermit meeqqanut sammisassaqaartitsineq annertusarneqassaaq, illut meeqqanut atugassiat iluarsartuunneqaanngikkunik nutaanik sanaartortariaqarpugut. Saaffiginniffissat sumiiffinni saaffissat annertusartariaqarpugut suliat meeqqanut tunngasut eqaannerusumik ingerlaleqqullugit. Meeqquarivinni atuarfinnilu pisussaaffiliineq annertusariaqarpoq angusarluttoqartarneranut imminnut pisuutittaattarneq suliassaqaartunut atorunnaarlugu qaninnerusumik suleqatigiinneq timitalerlugu nunarput tamakkerlugu qulakkeerneqaartariaqarpoq.

“Naliginnaasumik” ineriartortuaannannginnatta, meeraqarpoq immikkuullarissumik pisariaqaartitsisunik. Meeqqanik immikkuullarissunik pisariaqaartitsisunut sullissiviit annertusartariaqarpugut sapinngisamik inuunerminni immikkut pisariaqaartitsigaluarlutik imminut napatissinnaaqqullugit.

Suliassarpassuit immikkuualuttutut taaneqaartartut Naalakkersuisut, inatsisartut, kommunit, ataatsimiisitaliat il.il atorunnaarlugit meeqqagut pillugit, nunarput pillugu ineriartorneq pitsaanngitsumut ingerlasoq mumisittariaqalerparput akisussaaffimmik tigusilluta utaqqiinnarata.

Nuna namminiilerniarloq akisussaassuseqaartunik ilatsiinnanngitsunik kiffaanngissuseqarusuttunillu innuttaqaartariaqarpoq allanik isumalluuteqarneq piunnaarlugu. Tamanna anguneqassappat meeqqatsinnit aallartittariaqarpugut nammineq akisussaaffimmik tigusinitsinnik.

Taamatut oqaaseqarluta Siumumiit oqallinneq peqataaffigissavarput, qujanarlu oqallisissiamut.

Hans Peter Poulsen  
Siumut